



**Nunami naalackersuinikkut aqqissuussinermut Tunngaviusumik Inatsisissatut missingiut Inatsisartunut ingerlatitseqqinissaannut Inatsisartuniillu akuersissummik pinissaq pillugu Naalackersuisut inatsimmik missingiummik suliakkerneqarnissaannik Inatsisartut aalajangiiffigisassaattut siunnersuut. Missingiut Inatsisartunut kingusinnerpaamik UPA2027-mut saqqummiunneqassaaq.**

(Inatsisartunut ilaasortaq Pele Broberg, Naleraq)  
(siullermeerineq)

Inatsisartunut ilaasortap Pele Brobergip siunnersuutaanut qujanaq.

Tunngaviusumik inatsit, tunngaviusumik suliassani nunatut suliarisinnaasatsinni annersaasut ilagaat. Siunissatsinnut, tamat oqartussaaqataanitsinnut, pisinnaatitaaffitsinnut, naalagaaffimmullu namminersortumut tunngavissiisinnaasunut sinaakkutinut tunngassuteqarpoq.

Tamanna pillugu suliaq pimoorunneqassaaq. Peqqissaarutamik, ammasumik, suliatigullu pitsaasumik suliaassaaq. Tunngaviusumik inatsit politikikkut nalinginnaasumik allaatigisaanngilaq. Inuiaqatigiinni tunngaviuvoq. Tamanna pillugu aamma suliaq tuaviunneqassanngilaq.

Ingerlariaqqinnissamik kissaateqarneq Demokraatit paasilluarsinnaavaat. Tunngaviusumik inatsisissaq pillugu isumalioqatigiissitap suliani tunniutereerpaa, qanorlu ingerlariaqqittoqarnissaanik amerlasuut paasinnikkusunnerat pissusissamisuginnarpoq. Kisianni suliap pingaaruteqarnera patsisaarpiarluni, suliaq aallartinneqareersoq malissallugu aalajangiisuuvoq.

Inatsisartut Naalackersuisut peqqunikuaat, ilisimasani tunngavilimmik § 21 isumalioqatigiissitamik pilersitsissasut. Taassuma ilaatigut Namminersorneq pillugu inatsisip § 21-a qulaajartussaavaa, inatsimmut tunngaviusussamut missiliut nalilertussaavaa, naalagaaffinngoriartormullu tunngasortaa, tamat oqartussaaqataa nerat tunngavigalugu tunngaviusumik inatsisinut naapertuunnersoq, nunallu tamalaat akornanni nutaaliaasuni pitsaassutsimigut naapertuunnersoq eqqarsaatigalugit isiginiartussaallugu.

Suliaq taanna ataqqissavarput. Inatsisartut namminneq kissaatigisaattut isumalioqatigiissitap inatsisitigut, teknikkikkullu naliliinissamik suliaqaleruttornerata saniatigut, Naalackersuisut inatsimmut tunngaviusussamut missiliummik naammassinninniarnissaa isumassaqqanngilaq.

Demokraatit isumaat malillugu nammineq aalajangiinerunissaq, namminersorsinnaanissarlu



pingaaruteqarput. Kisianni akisussaassuseqartumik, erseqqissusumik, inuiannillu tatiginninnermik tunngaveqassaaq. Alloriaatissat pingaarutillit qaangiinnarutsigit, suliassaq nukittorsarusutarput tamannarpiaq ajoquseratarsinnaavarput.

Tamanna pillugu Demokraatit isumaqarput, tunngaviusumik inatsisissamik suliaqarnermi alloriaatissaq tulleq isummerfigitinnagu, § 21 isumalioqatigiissitap suliaa utaqqissagipput. Suliamut akerliunerunngilaq. Isumaanut ataqqinninneruvoq.

Taamatut oqaaseqarlunga Demokraatit inassutigaat, siunnersuut itigartinneqassasoq.